

讀通鑑綱目條記

讀通鑑綱目條記卷六

武進李述來紹仔

靈帝建寧元年以竇武爲大將軍

集覽 茶蓼之苦詩良耜篇以薅茶蓼注薅拔田  
草也茶陸艸蓼水艸也箋云薅去茶蓼之事言其  
勤苦

按此但以喻辛苦如云茹荼集蓼耳

追尊皇祖爲孝元皇

考異 祖上皇字羨按靈帝乃清河孝王曾孫其

祖未嘗卽帝位不當書皇

按朱子凡例祖上不當書皇以爲羨文是也以  
未嘗卽帝位不當書皇則非嘗卽帝位則無事  
追尊矣

段頰追擊東羌

質實 靈武地名注見唐元宗天寶十五年彼注  
云見太宗貞觀二十年貞觀二十年注云靈州漢  
之縣名以縣在河之洲上隨水高下未嘗淪沒故  
名靈州隨改靈武郡

按漢志北地郡有靈州靈武二縣州本作洲古  
字通也北魏孝昌中升爲州唐天寶初改爲靈  
武郡安祿山之亂太子至靈武卽位于郡城南  
樓是也漢靈武縣後漢省後周改置建安縣隋  
改廣閏縣唐仍爲靈武縣此段頰破羌于靈武  
谷是漢之靈武縣質實所注乃漢之靈州縣也  
胡注前書地理志北地郡有靈武縣靈武谷  
當在此縣界非唐靈州之靈武縣也余按唐之  
靈武縣卽漢之靈武縣其靈武郡則非耳胡氏

失考

太傅陳蕃大將軍竇武奏誅宦者

集覽 五官史漢官儀有詹事五官百官志五官  
中郎將一人比二千石主五官郎也

按胡注長樂五官史長樂太后宮也太後宮有  
女尙書五人五官史主之

又 免深病爲節等所賣病慮也患也  
按病猶愧恨也

二年復治鉤黨

集覽 刊章印行之文如今版榜

按胡注刊章者刊去張並姓名而下其章也

又 瞻烏爰止于誰之屋文公集傳曰言不幸而  
遭國之將亾將被囚執未知復從何人而受祿

按鄭箋視烏集于富人之屋以言今民亦當求  
明君而歸之核語意當引鄭箋不當引朱傳

熹平元年

集覽 祔配雜記曰男子祔于王父則配云云百  
四十言

按此但言祔廟配享耳雜記所言別是一義與此配祔無涉也

六年遣校尉夏育擊鮮卑

目 遣育出高柳旻出雲中各將萬騎出塞

按通鑑夏育出高柳田旻出雲中匈奴中郎將臧旻率南單于出鴈門三道出塞臧旻出鴈門句不可刪以下有三部大人各率衆逆戰也

光和元年青虹見玉堂殿庭中

目 賜秉之子也

按此五字已見建寧元年分注此重出

又 長水趙玪屯騎蓋升

按趙玪長水校尉蓋升屯騎校尉長水是地名  
屯騎是兵卒皆非官名也兩校尉字似不可省  
初開西邸賣官

目 令長隨縣豐約有價富者先入貧者到官倍  
輸

按原文或上書占令長隨縣好醜豐約有價富  
者則先入錢貧者到官然後倍輸似當仍原文



乃明晰

二年

綱 中郎將張修殺匈奴單于

按單于當書名

中平元年皇甫嵩朱儁與騎都尉合軍討三郡黃巾  
集覽 十六相禹稷契皋陶伯益伯夷羲仲羲叔  
和仲和叔夔龍朱虎熊羆

按十六相八元八愷也集覽鑿空無理

二年南宮雲臺災

集覽 哀公增賦孔門非之論語哀公問于有若  
曰年飢用不足云云

按原文哀公增賦孔子非之蓋指季孫欲用田  
賦使冉有訪諸仲尼事也集覽誤

三年

綱 荊州刺史討趙慈斬之

按荊州刺史似當書名

四年韓遂圍隴史

目 今兵不足以自守宜還鄉里

按賊圍燮于漢陽胡騎風懷燮恩共于城外叩  
頭請送燮歸鄉里故燮子云然今刪胡騎請送  
燮一節則宜還鄉里何不中情事圍城之中求  
去不得便思還里談何容易耶

集覽 漢陽郡名在蜀中今漢州

按韓遂之兵未嘗入蜀此漢陽卽天水也

六年帝崩皇子辨卽位

目 會疾篤屬協于蹇碩欲先誅何進而立協

按後漢書帝疾篤屬協于蹇碩及帝崩碩時在

內欲先誅進而立協蓋誅進非帝意乃帝崩後  
碩矯爲之者今刪去帝崩一層便失事實

獻帝初平元年卓奏免太尉琬

質實 西州注見齊明帝建武四年高昌國被注

云高昌本漢車師前後王地唐以其地置西州

按董卓隴西人故云公出自西州耳何必遠引

高昌

曹搆與卓兵戰于滎陽

集覽 大谷音太欲括地志太原郡大谷縣有大

谷山

按是時諸軍皆在河南安得北至太原後漢書  
注大谷口在故嵩陽西北八十五里北出對洛  
陽故城張衡東京賦盟津繞其後大谷通其前  
是也二年孫權進軍大谷距雒九十里卽此  
孫堅進兵擊卓

集覽 甄官甄陶也官謂官舍也如學官鹽官之  
官

按晉書職官志少府之屬有甄官令

管寧祁原王烈適遼東

集覽 格物史炤曰格古伯反廢格之格謂以清議廢人案房元齡不以已長格物注格胡客反謂扞格于物而無所容也

正誤 格物今案格謂標品之也

按此諸說皆未安格如格其非心之格胡注云格正也得之矣

四年魏郡兵與黑山賊于毒等共覆鄴城

書法 書曰覆鄴城士民之塗炭甚矣綱目書覆

一而已

按此乃是仍通鑑原文耳據後漢書所載不過云殺其太守而已不聞有屠戮之慘也

華山奔裂

書法 華山崩而漢亡恒山崩而晉亡皆帝業所由起也

按漢起關中謂華山爲帝業所起可也晉興則于恒山何與

大司馬劉虞討公孫瓚

考異 瓚非叛賊之比難以討書又按興平二年書虞子和攻公孫瓚不書討

書法 袁紹于瓚書擊此其書討何無上也惟劉虞得書之

按書法之義爲長

興平元年曹操復攻陶謙

集覽 開方姓名也

按開方衛之公子開非姓

陶謙卒



質實 四世五公四世袁安子敞孫湯曾孫逢也  
五公謂袁安爲司空又爲司徒子敞爲司空孫湯  
爲太尉曾孫逢爲司空

按四世五公安敞湯逢隗也

二年郭汜攻李傕

目 汜怒欲手刃彪彪曰卿尙不奉國家吾豈求  
生耶汜乃止

按通鑑中郎將楊密固諫汜乃止此削而不書  
似因彪言而止者疎矣又下云汜欲殺溫其弟

應諫之乃止書應不書密亦失平也

又 楊奉知將軍所爲非是

按原文楊奉白波賊耳猶知將軍所爲非是刪之乃令語意不明

集覽 黃白城在宏農郡

按黃白城在池陽縣晉愍帝初劉曜寇長安詔麴允屯黃白城永和六年苻健入關羌酋白犢屯黃白城迎降卽此池陽今三原縣地漢屬左馮翊安得至宏農

曹叅攻拔定陶

集覽

兗州首事叅初舉兵于陳畱故以兗州爲

首事

質實

兗州禹貢九州之一春秋時爲魯國

按章懷注曹叅初從東郡守鮑信等遙領兗州  
牧遂進破黃巾等故云兗州首事是也集覽云  
舉兵陳畱非是 又漢兗州所治非卽禹貢之  
域魯國于禹貢爲徐州非兗州

孫策擊劉繇

目 性闊達聽受善用人

按原文無性字增性字乃不可句讀

建安元年曹操入朝

質實 晉文公始返國敗楚師于城濮王告急于  
晉文公帥諸侯伐周而殺叔帶

按此序左傳事耳而亦顛倒乃爾

綱 曹操以荀彧爲侍中尙書令荀攸爲軍師郭  
嘉爲祭酒

按胡廣漢官注官名祭酒乃一位之元長故有

博士祭酒侍中祭酒專言祭酒則不知爲何官  
矣 通鑑以嘉爲司空祭酒胡注曰三國志作  
司空軍祭酒此逸軍字晉志曰當塗得志尅平  
諸夏初置軍師祭酒胡意蓋謂軍字不當刪余  
按百官志司空之屬無祭酒是時曹叅爲司空  
故以嘉爲軍師祭酒仍爲司空掾屬耳胡說是  
也

劉表立學校作雅樂

曰 今將軍號不爲天子合樂而庭作之毋乃不

可乎

按號不爲天子合樂不可解不字當羨也此蓋仍三國志原文分注于舊史無所不刪削而此等反不加考正何也

三年曹操擊張繡降之

質實 壽亭疑是縣名

按益壽乃是亭名

二年以孫策爲討逆將軍

目 番陽別立宗部海昏上祿不受發召

按原文番陽民帥別立宗部自言我已別立郡  
海昏上繚不受發召分注所刪省乃割裂舛午  
不復可句讀必欲其省何不云番陽民帥別立  
宗部不受發召

五年孫策卒

目 策欲乘虛襲許部署未發

按此據孫策傳也通鑑不從引孫盛異同評以  
駁之可謂至當異同評云袁紹以建安五年三  
月至黎陽策以四月遇害而志  
云策聞曹公相拒于官渡遂去今仍改依策傳可謂好議論而

不察其實也

袁紹攻曹操于官渡

集覽 子卿許攸字

按攸字子遠

又 烏巢今睢州有巢亭或曰卽古烏巢也

按烏巢乃酸棗之烏巢澤水經注濟濱又東經

酸棗縣之烏巢澤澤北有故亭是也在今開封

府延津縣境時相拒于官渡

今開封中牟縣境

無緣轉

南至睢州也



六年擊劉備于汝南

考異 擊上當有搦字

按此蒙上爲文不當有搦字

八年孫權遣兵討山越平之

目 賀齊討建安料出兵萬人

按通鑑建安漢興南平民作亂聚衆各萬餘人  
權使南部都尉賀齊進討皆平之分注不宜單  
舉建安

十一年烏桓寇邊

集覽 泉州縣名也屬漁陽郡在幽州雍奴縣南

按魏志鑿渠自呼沱入派水名平虜渠又從洶  
河口鑿入潞河名泉州渠

十三年以馬騰爲衛尉

目 以騰子超爲偏將軍代領其衆

按通鑑曹叅將征荊州使張旣說騰還朝騰許  
之而更猶豫旣恐其爲亂乃移諸縣促儲侍二  
千石郊迎騰不得已發東叅表騰爲衛尉此係  
涼州安危之機綱之書此意亦當爾分注不宜

盡削

劉備奔江陵

集覽 當陽之長坂元和志緣林山在當陽縣東南百二十里卽所謂當陽之長坂也

按荊州記云當陽縣東有櫟林長坂緣林當從荊州記作櫟林

搃進軍江陵

集覽 范蠡春秋越大夫越王句踐欲伐吳范蠡不可後越竟滅吳蠡遂扁舟浮于五湖

按此不知其所據何書也

獻帝建安十四年掾軍還譙

目 掾留張遼樂進李典屯合肥而還遼軍中嘗  
有謀反者夜驚亂起火一軍盡擾遼曰是不一軍  
盡反必有造變者欲以驚動人耳乃令軍中其不  
反者安坐遼將親兵數十人中陳而立俄頃皆定  
卽得首謀者殺之

按張遼本傳時荊州未定復遣遼屯長社臨發  
軍中有謀反者夜驚亂起火云云則此事在掾

未攻荊州時故通鑑亦載此事于建安十三年之夏分注以爲屯合肥時事誤矣

十六年馬超韓遂等反

集覽 西河晉地秦并爲太原郡今邠州有西河縣

按分注自蒲城渡西河此槩指雍河之西耳

十八年馬超入涼州

質實 歷城縣名注見宋文帝元嘉七年彼注云見漢光武建武五年歷下

按質實所注乃濟南之歷城時姜敘與馬超相持于涼州安得至濟南水經注歷城在西縣去仇池一百二十里宋白曰晉置仇池郡于歷城是也今爲成州境

十九年備入成都自領益州牧

目董和爲蜀郡太守清儉公直爲民夷所受信按和本傳遷益州太守清約如前與蠻夷從事務推誠心南土愛而信之通鑑作董和在郡蓋承上益州太守南郡董和之文而言耳分注以

爲蜀郡失考

二十年立貴人曹氏爲皇后

書法 不書立魏公孫女何命自上出也

按十八年已書魏公孫納三女爲貴人矣此乃  
蒙前省文耳

綱 孫權攻合肥大敗而還

按吳志權征合肥合肥未下撤軍還兵皆就路  
權與凌統甘寧等至津北爲魏將張遼所襲統  
等以死捍權權乘駿馬越津橋得去蓋此時權

大軍以就路權與統等殿後幾爲遼所劫耳軍未  
嘗敗也但當云不克而還云大敗而還則失其  
實

目 陷陣衝壘入至麾下權大驚走撤軍還至逍  
遙津北遼將步騎奄至

按遼傳遼夜募敢從之士八百人平旦遼披甲  
持戟先登陷陣殺數十人斬二將衝壘入至權  
麾下權大驚走高冢以長戟自守望見遼所將  
衆少乃聚圍遼數重遼左右麾圍直前急擊無



敢當者自旦戰至日中吳人奪氣還修守脩衆  
心乃安權守合肥十餘日城不可拔乃引退遼  
率諸軍追擊復幾獲權蓋衝壘至麾下是一時  
事逍遙津北步騎奄至是一時事分注混而爲  
一略去守合肥十餘日一節失事實矣

二十三年

綱 少府耿紀司直韋晃起兵討魏王操

按三國志則云太醫令吉本與少府耿紀司直  
韋晃等反通鑑則從三輔決錄云京兆金祿觀

漢祚將移乃與少府耿紀司直韋晃太醫令吉  
本本子邈邈弟穆等謀殺必挾天子以攻魏據  
此則耿紀韋晃非本謀之人綱中似不宜轉略  
金祿吉本又分注中似不宜竟略邈穆等名

二十四年劉備自立爲漢中王

目 王以一時之功隆崇漢室

按漢室當是漢升黃忠字也羽怒忠位並已故  
詩解之如此否則隆崇二字無著矣然三國志  
通鑑俱作漢室

二十五年魏王曹丕稱皇帝

集覽 繁陽魏郡邑徐廣曰在頓邱或曰曹丕卽位不在此左傳襄四年楚師在繁陽注繁陽在汝南鰲陽縣南案當是此繁陽

按不是時南巡至潁川潁陰縣築壇于曲蠡之繁陽亭述征記曰其地在許南七十里東有臺高七丈方五十步南有壇高二丈方三十步卽受終之壇也

昭烈皇帝章武元年漢中王卽皇帝位

目 司馬公曰三代之前云云

按朱子不從通鑑而以蜀漢爲正統分注中轉  
詳著司馬公蜀不得紹統之說何牴牾也

二年魏作壽陵

集覽 魏作壽陵綱目書之譏非禮也家語曰孔  
子在宋見桓魋自爲石槨冉子曰禮凶事不豫云  
云

按初陵昌陵前已屢書之何忽于此以爲譏豫  
凶事乎據分注務從儉薄不藏金玉一用瓦器

則朱子書之之意當是予之耳 又譏非禮也  
云云不似集覽之文或是書法刊本訛作集覽  
邪

後主建興元年魏師攻濡須

質實 中洲一在長沙府瀏陽縣學前一在郴州  
城東郴江中

按此時吳魏相持于濡須中洲乃江中之洲濡  
須城在廬州府無爲州東北中洲安得在瀏陽  
郴州乎 又吳孫盛督萬人據江陵中洲魏黃

初四年張郃破吳兵奪據江陵中洲此又是江陵中洲與此濡須之中洲異要皆指江中沙洲言

綱 益州部耆帥雍闓等以四郡叛

按蜀志牂牁太守朱褒擁郡反先是益州郡有大姓雍闓據郡不賓越鶴夷王高定亦背叛又通鑑吳以闓爲永昌太守永昌功曹呂凱府丞王伉率吏士閉境拒守闓不能進

據呂凱傳

蓋叛者

實止三郡蜀志稱亮南征四郡蓋兼永昌言之

然永昌實未嘗叛綱書以四郡叛失考也分注  
中刪去以闔爲永昌太守一節亦疎

二年魏主丕以舟師擊吳

考異 擊當作伐

按列國自相攻耳魏非正統也不得書伐

集覽 蔡潁蔡卽九江郡下蔡縣

質實 謂上蔡縣及潁川郡也

按此祇謂蔡河潁水故曰循蔡潁浮淮耳不謂  
下蔡縣潁川郡也蔡河自浚儀東南流入潁潁

水東南流至慎縣入淮

三年丞相亮討雍闓斬之

集覽 益州郡國注云古蜀國也漢武改古梁州曰益州隋改爲蜀郡

按此益州在今雲南非蜀郡也

魏師臨江而還

集覽 土脉徒魂反字通作墩加土爲堆也

按廣韻作埵云以艸裹土築城及填水也集覽非是



四年魏殺其執法鮑勛

集覽

三官駁駁謂駁議也執意不回也

按此五字與上

不接不  
可解

記大樂正大司寇市三官

按胡注三官廷尉正監平也集覽謬甚

綱

吳攻襄陽魏撫軍司馬懿擊破之

按撫軍是魏置將軍之號猶冠軍鎮軍也似不得離將軍字爲文

讀通鑑綱目條記卷七

武進李述來紹仔

後主建興六年吳大司馬呂範卒

集覽 陽羨卽毘陵也

按陽羨無毘陵名

七年吳以張昭爲輔吳將軍

集覽 中不進見中間因逆旨故不曾敢進見

按文義本明解之轉晦

吳遷都建業

集覽 信國家之利器老子國之利器不可以示人又人多利器國家滋昏林希逸云利器威權也按此利器是指賢人之用如論語善事先利器賈誦盤根錯節以別利器耳非謂威權也

### 築漢樂二城

集覽 沔陽本江夏竟陵縣諸葛亮築漢城于此隋置沔州唐改復州今改沔陽府

按此沔陽在漢中郡非今江夏之沔陽也水經注沔水逕白馬戍城南城卽陽平關也又東逕

武侯壘南又東逕沔陽故城南城南對定軍山  
又東過南鄭縣又東過成固縣南是也皆在漢  
中府境爲今沔縣地若江夏之沔陽則時方屬  
吳與成固相距且千里

十四年帝如沔觀汶水

集覽 地理志蜀郡有沔縣

質實 沔漢縣名屬廣漢郡

按蜀郡有沔氏道無沔縣也以爲屬廣漢郡尤  
謬

十五年

綱 春正月魏黃龍見以三月爲夏四月

按以三月爲夏四月似于詞理不順後書魏復以建寅之月爲正此何不云以建丑之月爲正耶

魏擊遼東不利

集覽 母邱儉母邱複姓顏師古曰母邱曼邱本是一姓語有慢急耳母音無

按母音無三字非師古注集覽妄增之非也母

音貫貫曼音近故云語有急慢耳史記田完世家宣公伐魏取母邱索隱曰母音貫母邱古國名衛之邑今作母字者殘缺耳母之音貫此亦可証 又按說文母穿物持之也从一橫母象讀若冠又貫錢貝之貫从母从貝蓋母本自爲一字古或通用不關殘缺

魏營員方正南北郊

集覽 禘禮禮記虞夏禘黃帝殷周禘帝嚳注此禘謂祭昊天于圓丘也

按所注止此足矣下又泛論宗廟禘祫百餘言  
則與本文無涉

書法 圓方澤高下之義古也皆取諸土非矣  
按周禮明言地上之圓土澤中之方土安得以  
皆取諸土爲非

魏鑄銅人起土山于芳林園

集覽 易心而度易更改也度謀也

按文義易心而度猶云易地而觀耳集覽非

又 錄奪士女士女軍士之女

按本文詔錄奪士女前已嫁爲吏民妻者還以配士則此所謂士是士大夫之士非軍士之士蓋當時重門閤也

魏光祿勳高堂隆卒

集覽 異類之鳥黃初四年有鵜鵠鳥集于靈芝池

按隆意指黃初元年未央宮有燕生鷹口爪俱赤故曰宜防鷹揚之臣于蕭牆之內也若鵜鵠則何鷹揚之有



延熙二年吳將周胤有罪

目而二君居間

按原文以公瑾之子而二君在中間苟能使改  
亦何患乎在中間謂往來調護也今改爲居間  
居間乃解搆之謂非好事矣

四年吳人攻魏魏擊卻之

集覽 祖中未詳其處春秋襄十年會吳于祖注  
祖楚地音莊加反恐卽此

按襄陽記祖讀租稅之租祖中在上黃界去襄

陽一百五十里魏時夷正權敦兄弟三人部曲  
萬餘家屯此分布在中廬宜城西山臨河二谷  
中土地平敞宜桑麻有水陸良田河南之膏腴  
沃壤謂之柎中杜佑曰柎中在襄州南漳縣界  
是也春秋所謂柎在今沛縣非是

五年

綱 監軍姜維自漢中徙屯涪

按下書前監軍王平之例此當書右監軍姜維  
十二年魏司馬懿殺曹爽及何晏等夷其族

集覽 子丹佳人佳好也佳人猶言佳士李延年歌曰北方有佳人絕代而特立

按引延年歌不解所謂

又 疆幹弱枝京師爲幹四方爲枝

按文義是謂同姓爲幹異姓爲枝

魏以司馬懿爲丞相加九賜不受

考異 提要作魏司馬懿自爲丞相加九錫復辭不受按篡賊例注當從提要

書法 書以何命自上出也不受則懿亦可謂稍

知節矣

按晉氏之篡成于誅爽書法以爲知節非也當  
如考異之說

十五年吳主權卒

集覽 罷視聽罷不御也視聽聲色之好也息校  
官息屏去也校官卽校人周禮校人掌王馬之政  
按胡注吳主權置校官典校諸官府及州縣文  
書專任以爲耳目卽所謂視聽也息校官卽所  
以罷視聽也視聽非聲色校官亦非馬圉

十八年姜維伐魏敗其兵于洮西

目 進兵東向據櫟陽積穀之實

集覽 櫟陽注見周顯王八年

按櫟陽縣前漢屬左馮翊胡注曰櫟陽在長安東北維兵方至狄道安得便東據櫟陽泰蓋言

略陽耳櫟音藥藥略聲相近而訛也余按漢略

陽在今秦安縣

今略陽乃漢沮縣地元始名略陽

正當關隴之

衝胡說是也又下文云招納羌胡東爭關隴若

至馮翊之櫟陽

今西安府臨潼縣

則與羌胡不接又已

包關隴而東不必云東爭關隴矣

十九年姜維伐魏與其將鄧艾戰敗績

目維聞艾有備乃回趣南安艾與戰于段谷大破之

按蜀書維與鎮西大將軍胡濟期會上封濟失誓不至維遂爲鄧艾所破于段谷此節似不宜略

魏以盧毓爲司空

集覽 海沂索隱曰沂水出東海故曰海沂

按祥爲徐州別駕徐州之地東際海西北距泗  
沂故曰海沂也且沂水安得出東海

二十年姜維伐魏

集覽 長城卽方城也楚之北境括地志云方城  
山在許州葉縣西南杜預曰方城在南陽葉縣之  
境山自北陽連百里號曰方城亦曰長城

按此長城在右扶風武功盩厔間水經注云洛  
谷水北流逕長城西魏甘露三年蜀遣姜維出  
洛谷圍長城卽斯地也集覽乃以爲葉縣之方

城大謬

景耀元年魏司馬昭拔壽春殺諸葛誕

集覽 三河謂河南河內河東三郡也周禮職方氏河南曰豫州河東曰兖州河內曰冀州

按旣指言三郡卽不得復引職方之三州漢之河東并非兖州也

三年魏司馬昭弑其主髦于南闕下

集覽 并命言以此而與主並死

按語意謂子母並死耳非謂臣主並死也



四年魏遣兵迎吳降將

集覽 沮水括地志嶓冢山水始出山沮洳因名  
沮水又云沮水一名川水源出雍州富平縣東入  
棧陽縣案地理志萬年縣南有涇渭北有小河卽  
沮水也章懷曰水出武都郡東狼谷南至沙羨南  
入江

按應劭曰沮水出漢中房陵東入江章懷以爲  
出武都郡東狼谷非也又此是臨沮縣之沮水  
而忽引富平縣之川水尤謬

鮮卑索頭貢質于魏

集覽 詰汾元魏神元皇帝名

按詰汾是聖武帝神元帝名力微

五年姜維伐魏洮陽

集覽 洮陽縣屬零陵郡括地志云故城在今零陵湘源縣西北

按洮陽謂洮水之陽其地在今洮州界漢章帝建和三年羌攻南部都尉于臨洮帝遣馬防耿恭救之諸羌退聚洮陽卽此也以爲零陵之洮

陽東西不辨矣

炎興元年鄧艾至成都帝出降

集覽 鄧禹故事初禹收赤眉賊赤眉望風而降者日以千數禹所至輒停車駐節以勞來之

按艾依鄧禹故事承制拜漢帝以下官蓋依鄧禹承制授隗囂故事耳非停車勞來之謂 赤眉入長安鄧禹與戰不利破赤眉者乃馮異也云赤眉望風降亦誤

晉武帝泰始五年晉以羊祜都督荊州軍事

集覽 鈴閣都督閣內置鈴架以警防不虞

按胡注閣下威儀也鈴下者有使令則掣鈴以呼之因以爲名閣下威儀掌出入贊導及納謁受事集覽非

八年晉太宰安平王孚卒

集覽 東園溫明祕器案後書禮儀志藏明器數符八甕三甌二瓦罍一云云

按服虔謂東園溫明形如方漆桶開一面漆畫之以鏡置其中以懸尸上大斂并蓋之師古曰

東園署名也屬少府其署主作此器溫明自爲  
一器集覽詳註明器無謂

咸寧二年晉徙河南尹夏侯和爲光祿勛

集覽 陳思王名植文帝卽位以植醉酒悖慢貶  
爵徙封遂發疾卒

按遂發疾卒四字誣甚

吳臨平湖開石印封發

曰 封其山爲王

按吳書封其山神爲王神字不宜刪

五年晉大舉兵分道伐吳

目 王濬巴東監軍唐彬下巴蜀

按王戎胡奮等俱不書官號獨唐彬書巴東監軍當是失刪耳

集覽 涂中涂音塗水名出益州牧靡南山西北入澠

按此引說文而誤也涂與滁同晉書宣帝紀王  
凌詐言吳人塞涂水蓋卽滁水源出慎縣西今  
合肥非益州之涂水也後主延熙十三年吳作

堂邑塗塘集覽云塗本作涂涂水出堂邑晉伐  
吳遣琅玕王出涂中卽此也語甚核不知此何  
以忽背前說

太康三年以張華都督幽州軍事

集覽 鍾會三國魏太祖時與鄧艾滅蜀

按以鍾會滅蜀屬之魏太祖時謬絕

散騎常侍薛瑩卒

目 其四五之間乎

按原文作妄得爲第一平語渾而意自顯改爲

四五之間似可不必

四年

綱 除祭酒曹志等名

按晉書博士庾勇等表畱齊王攸博士祭酒曹志因奏當如博士等議詔免志官以公還第勇等七人並除名祭酒乃博士之長當聯博士爲文削博士字誤同建安元年以郭嘉爲祭酒又志僅免官未嘗除名其除名者又非祭酒不當云曹志等當云免博士祭酒曹志官除博士庾



剪等名

惠帝元康五年索頭分其國爲三部

集覽 濡源在幽州分漢地理志濡水出涿郡易水至范陽入濡濡奴官切

質實 濡源濡水之源也出保定府易州城北三十里窮獨山

按上谷之北濡源之西濡源在上谷之北卽不得在易州也水經注濡水出禦夷鎮東南按魏世祖燕大破柔然高車徙降附之衆于漠南東

至濡源西暨五原分六鎮禦夷居六鎮之東今  
獨石口外至開平皆是其地濡水蓋卽今之灤  
水出宣化府西逕舊開平衛山薊州遵化縣入  
內地者是也易州窮獨山所出一名聖女水與  
此濡源異

九年觀擊萬年獲之

目 邱濬曰云云

按濬乃明人不知何緣列入分注卽此并疑分  
注所引胡氏諸人之說或亦多出後人羈附非

訥齋之舊而分注序事本文爲無識者之所改  
易未必不少矣安所得宋本一正定之 此書  
引邱氏之說凡十數條或贅分注末或贅發明  
末猶可言也或本無書法乃引邱濬曰而上冠  
以書法或本無發明乃引邱濬曰而上冠以發  
明種種謬戾凡叨刊本皆同

集覽 孰贊贊之言至也古者相見之禮手有所  
執以告至云云二百五十言

按所注泛濫無當胡注云周禮蕃國世一見各

以其所貴寶爲贅則確核矣

太安元年河間王頥使長沙王乂殺齊王冏

質實 陰盤地名未詳處所

按水經注冷水逕陰盤新豐兩原之間北流注于渭漢靈帝建寧三年改新豐爲都鄉封段熲爲侯國後立陰盤城其水際城北出謂是水爲陰盤水魏書地形志陰盤縣本屬安定晉屬京兆魏太平真君七年并入新豐胡氏駿之曰漢京兆與馮翊以渭水爲界安定在馮翊之北晉

安得割安定之陰盤以屬京兆邪此魏收之誤也又曰地形志涇州有平原郡治陰盤縣一志之間兩陰盤並載而不覺其誤以是見史學之難精也余按胡說非是宋白曰京兆昭應縣東十三里有漢新豐故城亦謂之陰盤城後漢靈帝末移安定陰盤縣寄理于此蓋陰盤本安定屬縣後漢以羌亂徙安定寄治美陽縣遂寄治新豐晉遂升僑縣屬京兆非割安定之陰盤屬京兆也後魏于舊陰盤地置平原郡復置陰盤

縣爲郡治于是遂有兩陰盤縣收志所載甚得其實是時郡縣僑立紛錯兩見者不一而足蓋紀載之體不得不爾不關史學之疎也此陰盤及後魏孝昌三年蕭寶寅攻殺關右大使酈道元于陰盤驛皆是京兆之陰盤舊唐書涇州良原縣隋陰盤縣又宋元嘉六年赫連定保平涼畋于陰盤皆是安定之陰盤京兆之陰盤西安府臨潼縣境安定之陰盤在今平涼府平涼縣境

晉惠帝光熙元年成都王雄稱成皇帝

集覽 執板按漢書注板詔書也

按晉書范長生詣成都雄迎之于門執板延坐  
蓋謂手板耳非詔書也

懷帝永嘉三年漢復遼洛陽北宮純擊敗之

目 劉聰等寇洛陽屯西明門北宮純等夜帥勇  
士出攻漢壁斬其將軍呼延顯聰南屯洛水而大  
司空呼延翼又爲其下所殺衆遂潰歸

按通鑑淵遣楚王聰王彌始安王曜汝陰王景

帥精騎五萬寇洛陽大司空呼延翼帥步卒繼  
之辛酉聰屯西明門北宮純等夜帥勇士千餘  
人出攻漢壁殺其征虜將軍呼延顥壬戌聰南  
屯洛水乙丑呼延翼爲其下所殺其衆自大陽  
潰歸聰表稱晉兵微弱不可以翼顥死故還師  
固請畱攻淵以宣于修之言召聰等還今分注  
前刪呼延翼帥步卒繼之句則翼爲其下所殺  
句無根又潰歸者呼延翼之衆耳云衆遂潰歸  
似聰等并潰歸者皆是刪節失宜也



四年琅玕王睿以周玘爲吳興太守

目 錢璿寇陽羨玘合鄉里討斬之

按通鑑太傅越徵建威將軍吳興錢璿及揚州  
刺史王敦璿謀殺敦以反敦奔建業告琅玕王  
睿璿遂反進寇陽羨睿遣將軍敦逸等討之周  
玘糾合鄉里與逸等共討璿斬之分注不著璿  
反直言寇陽羨則茫然不見端緒矣又玘與郭  
逸共討斬璿而以專屬之玘亦非

以拓跋猗盧爲大單于

集覽 陘趙世家武靈王攻中山令趙希并將胡  
代趙與之陘徐廣曰陘者山絕之名常山有井陘  
中山有苦陘正義曰陘音刑陘陘山也在并州陘  
縣東南十八里

質實 陘漢之縣名屬中山郡以陘山得名

按下云徙樓煩馬邑陰館繁峙崞五縣民于陘  
南則此陘蓋在今大同府境非中山常山也胡  
注陘北石陘關之北唐志鴈門縣有東陘關西  
陘關

五年

綱 湘州流民作亂推杜弼爲刺史

自 巴蜀流民布在荆湘間爲士民所困當作苦

湘州參軍馮素與蜀人汝班有隙言于刺史荀眺  
欲盡誅流民流民大懼四五萬家一時俱反推醴  
陵令杜弼爲湘州刺史

按晉書流民爲士民所苦蜀人李驤聚衆據樂  
鄉反王澄討之驤請降澄僞許而襲殺之沈八  
千餘人于江流民益怨忿蜀人杜疇等復反湘

州參軍馮素言于刺史荀眺曰巴蜀流民皆欲反眺信之欲盡誅流民流民大懼一時俱反以杜弢州里重望共推爲主弢自稱梁益二州牧領湘州刺史據此則湘州刺史弢所自稱今以流民推弢爲刺史爲文似弢迫于不得已者未免縱釋有罪矣 又流民再反故馮素以恐荀眺欲盡誅之澄沈八千人于江故流民懼誅一時盡反今刪去李驤杜疇兩事又刪去流民皆欲反句而直云欲盡誅流民夫流民已爲土民

所苦矣又無端而欲盡誅之于事理不大悖耶  
六年漢封帝爲會稽郡公

考異 封上漏降字

按前封平阿公此封會稽郡公乃進封也安得  
云降

王敦殺其兄荊州都督澄

集覽 沓中本河關之西南羌地

按胡注此沓中非姜維種麥之沓中蓋在屏陵  
之東

愍帝建興三年左丞相睿以周札爲吳興太守

集覽 傳教格殺之格者相抱而殺之

按格敵也無相抱意

漢寇馮翊陷之

集覽 靈武注見唐元宗天寶十五載彼注云靈  
武漢朔方郡今夏州

按此靈武乃漢北地郡之靈武縣非朔方也亦  
作零武建興元年麴璆救長安與劉曜相遇于  
零武大敗又四年劉曜圍北地麴允救之曜敗

允於礪石谷允奔還靈武曜遂取北地卽此也  
四年劉曜陷長安

集覽 靈臺縣名屬安定今涇川縣

按此靈臺卽文王靈臺三輔黃圖周文王靈臺  
在長安西四十里是也是時曜方攻長安何得  
西向安定 又靈臺縣隋始析漢之鶉觚縣置  
之晉時尚未有此縣

石勒以李回爲高陽太守

目 勒遣孔萇攻賊帥馮瞻

按晉書言萇攻賊帥馬嚴馮膺又張賓曰嚴膺  
本非公之深仇又李回爲高陽太守嚴懼出走  
膺降皆嚴膺並言而嚴又在膺先分注獨削馬  
嚴何也